

Chauffeurnan cu cobra 1 Florin extra ta 'hunga' cu nan vergunning

Ministerio di Transporte a indica cu ainda Autobus no por cobra 1 Florin extra

• *Gobierno ta OK cu subida di 1 Florin*

• *E proceso legal pa regla tarifa nobo no a finaliza ainda*

ORANJESTAD (AAN): E siman aki ya caba DIARIO a publica con chauffeurnan di Autobus mes a anuncia cu entrante aywe 1 di December 2022 nan lo hisa tarifa cu 1 Florin.

Pero riba Diaranson atardi laat, Ministerio di Transporte Publico na Aruba a reacciona, y bisa cu e aumento di tarifa no por socede ainda! Debi cu e proceso legal pa regla e tarifa nobo NO ta finaliza ainda.

A ser splica cu dia 18 juli Gobierno a duna un contesta positivo riba un peticion pa subi tarifa cu 1 Florin. Esaki a bin tres dia despues di a ricibi un carta di chauffeurnan di autobus, fecha 15 di juli.

Den e carta e chauffeurnan a expresa nan preocupacionnan y alavez entrega un peticion pa aumento di tarifa, en conexion cu entre otro e aumento di prijs di gasolin y diesel mundialmente. Den tres dia Gobierno a aproba esaki y den un carta a splica tur e consideracionnan y cu Minister di Transporte ta sostene e cambio di tarifa. Di biaha a



inicia tambe cu e proceso legal pa haci esaki realidad.

Despues di e fecha aki a reuni na varios ocasion cu representantenan di chauffeurnan di autobus. Tanto den e carta como den e combersacionnan a splica cu Aruba ta un estado di derecho y tur hende mester observa ley. E proceso legal pa haci e cambio di tarifa tin cu cana su caminda via diferente departamento y institucion. Ta nifica cu maske di parti di Ministerio e proceso a worde atendi cu tur prioridad, e parti legal di e proceso por dura algun luna. Actualmente esaki ta den su fase final y ta premira cu e proceso lo keda

cla den un pa dos siman.

Segun Ministerio, e chauffeurnan cu ta manda señalnan riba red social y prensa ta indica cu lo ahusta e prijs di autobus sin cu e proceso legislativo a termina oficialmente, ta haci algo no aceptabel. Autobus cu cobra mas di locual e maximo cu ley ta prescribi ta actua contra ley y tambe ta den violacion di e condicionnan di permiso.

Integridad ta exige cu nos mester tene nos mes na leynan y procesonan. Esaki ta conta pa e minister, departamento y institucionnan gubenamental, y tambe e ciudadano. E tarifa nobo lo drenta na vigor con-



forme ley y despues di publicacion.

Segun e Ministerio, e chauffeurnan cu cobra un tarifa cu aumento entante 1 di december 2022 ta violando ley vigente y tambe ta viola un condicion di nan permiso di autobus.

Pasaheronan cu worde cobra un aumento di 1 Florin prome cu e tarifa nobo ta na vigor legalmente, por informa Departamento di Transporte Publico (DTP) riba nan tipline 594-8660 (yamada of WhatsApp) of via info@dtp.gov.aw.

Tin comprension pa e situacion di chauffeur di autobus.

Netamente esey ta e motibo pakico Minister a sostene e peticion y a inicia e proceso legal pa adapta e tarifa. Pero aprobacion di minister no ta mas haltu cu ley y p'esey ta pidi tur hende pa observa ley y tambe e condicionnan cu tin poni den permiso individual.


Ministerio di Transporte lo informa ki dia e sistema di tarifa nobo lo drenta na vigor. E sistema di tarifa nobo ta ensersa un aumento di 1 Florin di e tarificanan maximo di autobus pa pasaheronan te cu 59 aña. Pa adulto mayor di 60 aña bay ariba e tarificanan no ta worde aumenta y lo keda igual na e tarifa actual.

Pelicula local "BLACKOUT" cu 3 nominacion na India

ORANJESTAD (AAN): Cu hopi orguyo e productor local Angel Soto ta anuncia cu su pelicula "Blackout" di e aña aki a causa furor ultimo na e Northeast International India Film Festival (NIIFF) 2022.

Tabata den september ultimo cu e pelicula a wordo estrena na Aruba. E storia tabata di e reportero "Juancho" cu a trata di alerta autoridadnan local cu Aruba tabata na punto di wordo ataca pa Alemannan. Ningun hende a kere.

Cu e estrenó a bini invitacion tambe pa varios film festival internacional y t'e siman aki cu Angel Soto a ricibi e noticia grato aki. Blackout a haya



3 nominacion pa e final cu ta 12 y 13 di december den Naithu Resort na Dimapur, Nagaland, India. Blackout ta nomina pa Best Feature, Best Director y Best male

Actor.

For di awa ta felicita Angel Soto y tur e elenco di Blackout deseando nan tur exito den e final.

